

Pagpangita sa Pagpabuhi

ADLAW 1 —LABING HAMILI NGA GASA NI JESUS

"Unsa pa gayud ka labaw pa sa langitnong Amahan nga mohatag sa Espiritu Santo ngadto sa mga nagapangayo kaniya!" (Lucas 11:13).

Ako Walay Kangho

"Ginoo, tudloi kami sa pag-ampo!" hangyo sa mga tinun-an. Nakita nila unsa ka konektado si Jesus adlaw-adlaw sa Iyang Langitnong Amahan ug naghandum sa susama nga gahum sa ilang kaugalingong kinabuhi.

Si Jesus mitubag uban ang usa ka halandomon nga pagtulon-an sa pag-ampo diha sa tulo ka mga bahin: ang Pag-ampo sa Ginoo, ang sambingay sa usa ka higala nga moabutay sa tungang gabii, ug—sa kulbahinam—ang panginahanglan sa mapinadayonon nga hangyo sa Balaang Espiritu (Lucas 11:1-13).

Diha sa sambingay (bersikulo 5-8), ang usa ka tawo walay ikapakaon sa usa ka bisita nga miabot dis-oras sa gabii. Ang tawo nagdalidali sa paghangyo sa iyang silingan og tinapay aron sa pagpakaon sa bisita, nga nagaingon, "Wala koy ikapakaon." Siya nagpadayon sa paghangyo hangtud sa kataposan gihatagan siyag tinapay alang sa iyang bisita. Niini nga sugilanon atong makita nga kita kinahanglan magduol kang Jesus aron sa pagdawat og usa ka butang aron ipahat sa uban. Sa dihang kita gusto mohatag sa Tinapay sa Kinabuhi, sagad kita makaamgo nga wala kitay kangho sa paghatag.

Unya si Jesus naglambigit sa problema niini nga sambingay (ako walay kangho) ngadto sa atog panginahanglanon sa paghangyo sa Balaang Espiritu: "Ug ingnon ko kamo, Pangayo, ug kamo pagahatagan; pangita, ug kamo makakaplag; pagtuktok, ug kamo pagaablihan" (Lucas 11:9).

Si Jesus Nagadapit Kanato: Padayon sa Paghangyo

Dinhi sa Lucas 11, si Jesus nagpahimug-at makanapulo ka higayon nga kita kinahanglan mangayo sa Balaang Espiritu sa atong mga kinabuhi. Wala na akoy nabal-an nga teksto diin Siya mahigugmaon kaayo nga nagaawhag kanato sa pagbutang og usa ka butang diha sa kasingkasing.

"Ug ingnon ko kamo, Pangayo, ug kamo pagahatagan; pangita, ug kamo makakaplag; pagtuktok, ug kamo pagaablihan. Kay ang tanan nga magapangayo magadawat, ug ang magapangita makakaplag, ug ang magatuktok pagaablihan. Ug kinsa bang amahana diha kaninyo nga kon ang iyang anak mangayog tinapay, hatagan hinoon niyag bato; o kon mangayo siyag isda, hatagan hinoon niyag bitin inay isda; o kon mangayog itlog, hatagan hinoon niyag tanga? Busa, kon kamo, bisan sa inyong pagkadautan, mahibalo man ganing mohatag ug mga maayong gasa ngadto sa inyong mga anak, unsa pa gayud ka labaw pa sa langitnong Amahan nga mohatag sa Espiritu Santo ngadto sa mga nagapangayo kaniya!" (Lucas 11:9-13).

Niini nga pipila nga mga bersikulo, si Jesus nagagamit sa verbo nga *pangayo* makaunom ka higayon ug nagapahimug-at sa alinghuna nga *pangita* makaduha ka higayon ug *panuktok* makaduha ka higayon. Kini tanan nga nagalihok nga verbo. Dayag Niya nga gipakita nga kinahanglan kita molihok aron mapuno sa Balaang Espiritu. Ang kataposang paggamit sa *pangayo* maoy sa Greigo *continuous sense*, nga nagkahulogan nga kinahanglan kita mangayo dili lang makausa kondili padayon sa pagpangayo—sa mapinadayonon. Dayag, nga si Jesus gusto magpukaw sa atong tinguha alang sa Balaang Espiritu niini nga kinasingkasing nga pagdapit. Siya nahibalo nga kita maalinggatan ang importanteng butang kon dili kita mapinadayonon mangayo alang sa dagaya nga mga panalangin sa Balaang Espiritu.

Diha sa *Christ's Object Lessons* kita nagabasa, "Ang Dios wala nag-ingon, Pangayo makausa, ug ikaw makadawat. Siya nagaawhag kanato sa pagpangayo. Walay puas padayon diha sa pag-ampo. Ang mapinadayonon nga

pagpangayo nagadala sa tigpangayo ngadto sa usa ka mas maikagon nga kinaiya, ug nagahatag kanoya og usa ka nag-uswag nga tinguha sa pagdawat sa mga butang alang sa iyang mga gipangayo" (p. 145).

Ug isipa alang sa usa ka gutlo, nganong si Jesus naggugol sa Iyang kaugalingon og daghang panahon diha sa adlaw-adlaw nga pag-ampo? Si Ellen White nagasaysay, "Kada buntag Siya nakigsulti sa Iyang Amahan sa langit, nagadawat gikan Kaniya sa inadlaw og usa ka presko nga bautismo sa Balaang Espiritu" (*Signs of the Times*, Nov. 21, 1895).

Bitaw, si Jesus maoy atong sumbanan niini. Pangutan-a imong kaugalingon: Kon si Jesus nangingahanglan og inadlaw nga pagpabag-o gikan sa Balaang Espiritu, unya unsa na kaha ka importante kini alang kanako?

Pamatuod ug Hagit gikan sa usa ka Sakop sa Iglesia

"Sa nangagi nga duha ka tuig ako nagaampo kada adlaw alang sa pagbobo sa Balaang Espiritu sa akong kinabuhi. . . Ang akong paglakaw sa Dios daw dili matuohan. Ang bunga sa Espiritu diha sa Galatia 5 nahimong mas makita diha sa akong kinabuhi sukad ako nangayo kang Jesus sa pagpuyo sulod kanako, sa pagbuhat sa Iyang kabubut-on sulod kanako, ug sa inadlaw magabag-o kanako pinaagi sa Balaang Espiritu. Ako adunay mas daku nga pagmaya diha sa pagbasa sa Biblia ug sa pagpahat kang Cristo ngadto sa uban, ug ako adunay usa ka kusgan nga tinguha sa pag-ampo alang sa uban; dugang pa niana, ang akong kagawian nausab sa kahibulongan. . . Ako nagaawhag kaninyo sa pag-ampo sa kada adlaw aron mapuno sa Balaang Espiritu sulod sa unom ka mga semana ug tan-awa unsay mahitabo" (C.H.).

Pag-ampo sa Pulong sa Dios

Nganong dili kita magbaton og daghan pang tubag sa pag-ampo?

"Adunay mga butang nga inyong tinguhaon, apan dili ninyo kini mabatonan; busa mopatay kamog tawo. Ug adunay mga butang nga inyong kaibgan, apan dili ninyo kini maangkon; busa kamo moaway ug makiggubat. Kamo wala managpakabaton tungod kay kamo wala man mangamuyo. Kamo nagapangayog mga butang apan dili managpakadawat niini tungod kay dinautan man ang inyong pagpangamuyo, aron lamang gastohon kini sa pagtagbaw sa inyong mga pangibog. " (Santiago 4:2, 3).

Langitnong Amahan, palihog pasayloa kami sa pagpasibaya sa pagpangayo sa makanunayon alang sa Balaang Espiritu. Salamat nga kon among ikompisal ang among mga sala, Ikaw matinud-anon sa pagpasaylo kanamo.

Ang among hangyo nagapadayag giunsa namo pagtamod ang tanyag sa Dios.

"Busa, kon kamo, bisan sa inyong pagkadautan, mahibalo man ganing mohatag ug mga maayong gasa ngadto sa inyong mga anak, unsa pa gayud ka labaw pa sa langitnong Amahan nga mohatag sa Espiritu Santo ngadto sa mga nagapangayo kaniya!" (Lucas 11:13).

Amahan, salamat sa pagsaad sa paghatag kanamo sa Balaang Espiritu. Kami nangayo sa pagbobo sa Balaang Espiritu karon, ug kami nagpasalamat kanimo alang sa pagtubag. Tudloi kamo sa pagsalig diha niini nga saad.

Gusto sa Dios sa paghatag kanatog kinabuhi sa madagayaon!

"Sa mosalig kanako, sumala sa giingon sa kasulatan, `Gikan sa iyang kasingkasing modagayday ang mga sapa sa tubig nga buhi.'" Ug siya nagsulti niini labut sa Espiritu nga pagadawat sa mga misalig kaniya; kay ang Espiritu wala pa man ikahatag, sanglit niadtong tungora si Jesus wala pa man himayaa. " (Juan 7:38, 39).

Ginoo, salamat sa paghatag og mga suba sa buhi nga tubig niadtong mga nanagtuo Kanimo. Palihog tabangi kami sa pagkinabuhi diha sa inadlaw, mapinadayonon nga pagtugyan kang Cristo aron nga Ikaw makatuman niini nga saad sa among mga kinabuhi.

Dugang nga mga Sugyot sa Pag-ampo

Pasalamat ug Pagdayeg: Pagpasalamat alang sa mga tino nga panalangin ug dayga ang Dios alang sa Iyang kaayo.

Pagsugid: Paggugol og pipila ka mga minutos alang sa pagsugid sa tago ug sa pagpasalamat sa Dios alang sa Iyang pagpasaylo.

Giya: Hangyos ang Dios sa paghatag og kaalam alang sa mga hagit ug mga desisyon karon.

Atong Iglesia: Hangyos ang Dios sa pagpanalangin sa mga paningkamot sa atong iglesia, sa lokal, sa rehiyon, ug sa tibuok kalibutan.

Lokal nga mga Hangyo: Iampo ang mga panginahanglanon sa mga membro sa iglesia, panimalay, ug mga silingan karon.

Pamati ug Tubag: Paggahin og panahon sa pagpamati sa tingog sa Dios ug sa pagtubag diha sa pagdayeg o pag-awit.

Mga Sinugyot nga Awit

SDA Hymnal: Spirit of the Living God (#672); Sweet, Sweet Spirit (#262); Fill My Cup, Lord (#493); Sweet Hour of Prayer (#478); Come, Holy Spirit (#269).